

0.0.1 balasaṅgahavatthusuttaṃ

0. sāvattthinidānaṃ

1. cattārimāni bhikkhave balāni, katamāni cattāri: paññābalaṃ viriyabalaṃ anavajjabalaṃ saṅgahabalaṃ. katamañca bhikkhave paññābalaṃ: ye dhammā akusalā akusalasaṅkhātā, ye dhammā kusalā kusalasaṅkhātā, ye dhammā sāvajjā sāvajjasaṅkhātā, ye dhammā anavajjā anavajjasaṅkhātā, ye dhammā kaṇhā kaṇhasaṅkhātā, ye dhammā sukkā sukkasaṅkhātā, ye dhammā asevitabbā asevitabbasaṅkhātā, ye dhammā sevitabbā sevitabbasaṅkhātā, ye dhammā nālamariyā nālamariyasaṅkhātā, ye dhammā alamariyā alamariyasaṅkhātā, tyāssa dhammā paññāya vodiṭṭhā honti vocaritā honti. idaṃ vuccati bhikkhave paññābalaṃ.

2. katamañca bhikkhave viriyabalaṃ: ye dhammā akusalā akusalasaṅkhātā, ye dhammā sāvajjā sāvajjasaṅkhātā, ye dhammā kaṇhā kaṇhasaṅkhātā, ye dhammā asevitabbā asevitabbasaṅkhātā, ye dhammā nālamariyā nālamariyasaṅkhātā, tesam dhammānaṃ pahānāya chandaṃ janeti vāyamati viriyaṃ ārabhati cittaṃ paggaṇhāti padahati. ye dhammā kusalā kusalasaṅkhātā, ye dhammā anavajjā anavajjasaṅkhātā, ye dhammā sukkā sukkasaṅkhātā, ye dhammā sevitabbā sevitabbasaṅkhātā, ye dhammā alamariyā alamariyasaṅkhātā, tesam dhammānaṃ paṭilābhāya chandaṃ janeti vāyamati viriyaṃ ārabhati cittaṃ paggaṇhāti padahati.

idaṃ vuccati bhikkhave viriyabalaṃ.

3. katamañca bhikkhave, anavajjabalaṃ: idha bhikkhave ariyasāvako anavajjena kāyakammena samannāgato hoti. anavajjena vacīkammena samannāgato hoti, anavajjena manokammena samannāgato hoti. idaṃ vuccati bhikkhave anavajjabalaṃ.

4. katamañca bhikkhave, saṅgahabalaṃ: cattārimāni bhikkhave saṅgahavatthūni. dānaṃ peyyavajjaṃ atthacariyā samānattatā. etadaggaṃ bhikkhave, dānaṃ yadidaṃ dhammadānaṃ. etadaggaṃ bhikkhave, peyyavajjānaṃ yadidaṃ atthikassa ohitasotassa punappunaṃ dhammaṃ deseti. etadaggaṃ bhikkhave, atthacariyānaṃ yadidaṃ assaddhaṃ saddhāsampadāya samādapeti niveseti patitṭhāpeti. dussīlaṃ sīlasampadāya samādapeti niveseti patitṭhāpeti, macchariṃ cāgasampadāya samādapeti niveseti patitṭhāpeti. duppaññe paññāsampadāya samādapeti niveseti patitṭhāpeti, etadaggaṃ bhikkhave, samānattatānaṃ yadidaṃ sotāpanno sotāpannassa samānatto, sakadāgāmī sakadāgāmissa samānatto, anāgāmī anāgāmissa samānatto, arahamaṃ arahato samānatto. idaṃ vuccati bhikkhave saṅgahabalaṃ. imāni kho bhikkhave cattāri balānīti.

5. imehi kho bhikkhave catūhi balehi samannāgato ariyasāvako pañcabhayāni samatikkanto hoti, katamāni

pañca: ājīvikabhayaṃ asilokabhayaṃ, parisasārajjabhayaṃ, maraṇabhayaṃ, duggatibhayaṃ. sa kho so bhikkhave ariyasāvako itipaṭisañcikkhati: nāhaṃ ājīvikabhayaṃ bhāyāmi, kissāhaṃ ājīvikabhayaṃ bhāyissāmi, atthi me cattāri balāni, paññābalaṃ viriyabalaṃ anavajjabalaṃ saṅgahabalaṃ. duppañño kho ājīvikabhayaṃ bhāyeyya, kusīto ājīvikabhayaṃ bhāyeyya, sāvajjakāyakammanto vacīkammanto manokammanto ājīvikabhayaṃ bhāyeyya, asaṅgāhako ājīvikabhayaṃ bhāyeyya.

6. nāhaṃ asilokabhayaṃ bhāyāmi. kissāhaṃ asilokabhayaṃ bhāyissāmi. atthi me cattāri balāni, paññābalaṃ viriyabalaṃ anavajjabalaṃ saṅgahabalaṃ. duppañño kho asilokabhayaṃ bhāyeyya, kusīto asilokabhayaṃ bhāyeyya, sāvajjakāyakammanto vacīkammanto manokammanto asilokabhayaṃ bhāyeyya, asaṅgāhako asilokabhayaṃ bhāyeyya.

7. nāhaṃ parisasārajjabhayaṃ bhāyāmi, kissāhaṃ parisasārajjabhayaṃ bhāyissāmi, atthi me cattāri balāni, paññābalaṃ viriyabalaṃ anavajjabalaṃ saṅgahabalaṃ. duppañño kho parisasārajjabhayaṃ bhāyeyya, kusīto parisasārajjabhayaṃ bhāyeyya, sāvajjakāyakammanto vacīkammanto manokammanto parisasārajjabhayaṃ bhāyeyya, asaṅgāhako parisasārajjabhayaṃ bhāyeyya.

8. nāhaṃ maraṇabhayaṣṣa bhāyāmi, kissāhaṃ maraṇabhayaṣṣa bhāyissāmi, atthi me cattāri balāni, paññābalaṃ viriyabalaṃ anavajjabalaṃ saṅgahabalaṃ. duppaṇño kho maraṇabhayaṣṣa bhāyeyya, kusīto maraṇabhayaṣṣa bhāyeyya, sāvajjakāyakammanto vacīkammanto manokammanto maraṇabhayaṣṣa bhāyeyya, asaṅgāhako maraṇabhayaṣṣa bhāyeyya.

9. nāhaṃ duggatibhayaṣṣa bhāyāmi, kissāhaṃ duggatibhayaṣṣa bhāyissāmi, atthi me cattāri balāni, paññābalaṃ viriyabalaṃ anavajjabalaṃ saṅgahabalaṃ. duppaṇño kho duggatibhayaṣṣa bhāyeyya, kusīto duggatibhayaṣṣa bhāyeyya, sāvajjakāyakammanto vacīkammanto manokammanto duggatibhayaṣṣa bhāyeyya, asaṅgāhako duggatibhayaṣṣa bhāyeyya.

10. imehi kho bhikkhave catūhi balehi samannāgato ariyasāvako imāni pañcabhayaṇi samatikkanto hotīti.